



**REGOLAMENT CUN CRITERIS E MODALITÂTS PE CONCESSION DI CONTRIBÛTS PE
REALIZAZION DI MANIFESTAZIONS CULTURÂLS PE CELEBRAZION DE FIESTE DE PATRIE
DAL FRIÛL, DAÛR DAL ARTICUL 6 DE LEÇ REGJONÂL DAI 27 DI MARÇ DAL 2015, N. 6
(ISTITUZION DE “FIESTE DE PATRIE DAL FRIÛL”)**

*Fat bon cun Deliberazion dal Consei di Aministrazion n. 52 dai 22 di Dicembar dal 2015,
modificât cun Deliberazion dal Consei di Aministrazion n. 46 dai 21 d Dicembar dal 2017
e cun Deliberazion dal Consei di Aministrazion n.12 dai 17 di Fevrâr dal 2021.*

Regolament cun criteris e modalitâts pe concession di contribûts pe realizazion di manifestazions culturâls pe celebrazion de Fieste de Patrie dal Friûl, daûr dal articul 6 de leç regionâl dai 27 di Març dal 2015, n. 6 (Istituzion de “Fieste de Patrie dal Friûl”)

Art. 1 finalitâts

Art. 2 beneficiaris

Art. 3 ativitâts finanziabilis

Art. 4 procedure pe individuazion dai beneficiaris

Art. 5 procedure speciâl pal finanziament dal Comun che al ospite la manifestazion principâl

Art. 6 domande di partecipazion al bant

Art. 7 spesis amissibilis e spesis no amissibilis

Art. 8 istrutorie e concession dal contribût

Art. 9 variaziions e proroghis

Art. 10 erogazion dal contribût

Art. 11 rindicontazion

Art. 12 rimant

Art. 13 jentrade in vore

Art. 1 finalitâts

1. La Agenzie Regionâl pe Lenghe Furlane, di culî indenant ARLeF, pe atuazion dal articul 6, come 1, de Leç regionâl dai 27 di Març dal 2015, n. 6 (Istituzion de “Fieste de Patrie dal Friûl”), definide di culî indenant leç, e dal articul 2, come 1, letare l), dal Statût de ARLeF fat bon cun D.P.Regj. n. 0102/Pres. dai 19 di Avrîl dal 2005, te suaze di un program anuâl specific fat bon de Zonte regionâl, e sosten la realizazion di manifestazions culturâls pe celebrazion de “Fieste de Patrie dal Friûl” di bande di ents locâi in colaborazion cu lis pro loco e cun altris sogjets publics e privâts cence finalitâts di vuadagn o cun finalitâts mutualistichis, midiant de concession di contribûts daûr des modalitâts e dai criteris previodûts di chest regolament.

Art. 2 beneficiaris

1. A acedin ai contribûts normâts di chest regolament i ents locâi che a àn la lôr sede legâl in Friûl.

2. Par “Friûl” si intint il teritori des ex Provinciis di Gurize, Pordenon e Udin de Region Autonome Friûl – Vignesie Julie e i Comuns di Cint, Concuardie, Fossalte, Gruâr, Puart, San Michêl dal Tiliment, Tei de Region Venit.

Art. 3 ativitâts finanziabilis

1. A son finanziabilis lis ativitâts culturâls che a vedin tant che finalitât la celebrazion de “Fieste de Patrie dal Friûl” individuadis dal program contignût tal articul 6 de leç.

Art. 4 procedure pe individuazion dai beneficiaris

1. I beneficiaris a son individuâts daûr des modalitâts di procediment previodudis di un bant di pueste. Il bant al è emanât cun decret dal Diretôr de ARLeF, di cumò indenant definît Diretôr, dentri di 15 dîs de aprovazion di bande de Zonte regionâl dal program contignût tal articul 6 de leç. Il bant al è publicât sul sît Internet de ARLeF.

2. Al bant descrit tal come 1 i ents locâi a puedin partecipâ in maniere singole o in forme agregade.

3. Il bant al da indicazion di chescj elements:

- a) ativitâts finanziabilis, tal rispjet di ce che al previôt l'articul 3;
- b) risorsis finanziariis metudis a disposizion e procediments pe individuazion dai beneficiaris e pe cuantificazion dal contribût;
- c) percentuâl massime dal contribût ARLeF su la spese che si stime amissibile;
- d) percentuâl minime di cofinanziament corispondente su la spese che si stime amissibile par ognidune des ativitâts;
- e) tiermins di inizi e di fin pe realizazion des ativitâts;
- f) tiermin e modalitâts di presentazion des domandis;
- g) modalitâts di erogazion dal contribût;
- h) modalitâts e tiermin di rindicontazion;
- i) ogni altre informazion utile e/o recursât.

Art. 5 procedure speciâl pal finanziament dal Comun che al ospite la manifestazion principâl

1. La ARLeF e sosten il Comun che al ospite la manifestazion principâl de "Fieste de Patrie dal Friûl", individuât ogni an dal program contignût tal articul 6 de leç, cuntun contribût specific fissât dal stes program, pe organizazion de stesse manifestazion e pe realizazion di iniziativis culturâls in ocasion de Fieste.
2. La domande pe concession dal contribût e va presentade ae ARLeF dentri di 15 dîs de aprovazion, di bande de Zonte regionâl, dal program contignût tal articul 6 de leç.
3. Ae domande e à di jessi zontade la relazion ilustrative de ativitât programade e il preventîf particolâr di spese. Il procediment al è disciplinât de leç regionâl dai 20 di Març dal 2000, n. 7 (Test unic des normis in materie di procediment aministratîf e di dirit di acès) e di chest Regolament.

Art. 6 domande di partecipazion al bant

1. La domande, firmade dal rapresentant legâl o di une altre persone cun deleghe e podês di firme, dal ent che al propon o dal ent a cjâf, se si trate di domande presentade in forme di agregazion, e je presentade, complete in ogni sô part, tes modalitâts e dentri i tiermins fissâts tal bant dal art. 4, cun pene di inamissibilitât.
2. Ae domande si à di zontâ cheste documentazion:
 - a) relazion ilustrative des manifestazions culturâls programadis, cu la indicazion des pro loco e/o di altris sogjets publics o privâts cence finalitâts di vuadagn o cun finalitâts mutualisticis che cun lôr l'ent al intindi colaborâ;
 - b) preventîf particolâr cu la indicazion di ogni vôs di spese singole;
 - c) plan di finanziament che al specifichi: la misure dal contribût domandât ae ARLeF, che in ogni câs nol pues lâ di là dal impuart massim stabilît dal bant; la evidence analitiche dal cofinanziament che al rive di altris contribûts o di finanziaments publics o privâts, o des jentradis gjeneradis de realizazion de ativitât stesse, o dai fonts propriis dal beneficiari, tal rispjet dai limits fissâts dal bant;
 - d) document di agregazion, tal câs che la domande e sedi presentade di plui ents locâi in forme agregade;
 - e) altris documents specifics domandâts dal bant, se dal câs.

Art. 7 spesis amissibilis e spesis no amissibilis

1. La determinazion de spese amissibile a contribût e je fate su la fonde de verifiche di coerence e di congruitât tra lis previsionis specificadis te relazion ilustrative des ativitâts culturâls proponudis e il preventîf particolâr di spese, cu chestis specificazions:

- a) lis spesis par cjamis fiscâls, previdenziâls, assicurativis a son ametudis se a son obligatorii par leç e te misure che a risultin in efjets a caric;
- b) lis spesis pal personâl dipendent a son amissibilis dome in maniere limitade aes zornadis/oris di lavôr riferidis ae ativitât culturâl e impleadis par rivâ ai risultâts de stesse;
- c) lis spesis di ospitalitât a son amissibilis dome se a son coerentis cu la iniziative progjetuâl e dut câs dentri dal limit massim dal 10 par cent dal cost totâl de stesse;
- d) la IVZ e je amissibile dome se no pues jessi recuperade e recuperabile, e duncje e constituìs un cost pal beneficiari;
- e) lis spesis gjenerâls a son amissibilis dome se a son coerentis cu la ativitât culturâl e dut câs dentri dal limit massim dal 10 par cent dal cost totâl de stesse.

2. No son amissibilis lis spesis:

- a) di rapresentance;
- b) pal acüst di bens imobii o mobii registrâts;
- c) pal acüst di bens mobii no specificâts a clâr tal Bant;
- d) par cjamis finanziariis, amendis, penâls, interès, spesis legâls;

3. Lis spesis a son sostignudis jenfri il tiermin iniziâl e chel finâl di realizazion des iniziativas progjetuâls e a son provadis cun faturis saldadis o cun documents contabii che a vedin fuarce di prove ecuivalente.

Art. 8 istrutorie e concession dal contribût

1. L'Ufici di direzion, nomenât di ca indenant Ufici, al verifich la sussistence dai recuisîts di amissibilitât, al verifich la completece e la regolaritât formâl des domandis, al domande i sclariments dal câs e lis integrazions in merit a chês.

2. Dopo di chest, su la fonde dai criteris previodûts dal bant, l'Ufici al individue i beneficiaris e al cuantifiche il contribût.

3. Finît il procediment, cun decret dal Diretôr, si dan fûr:

- a) la liste des ativitâts ametudis a contribût, cu la indicazion dai beneficiaris e dal contribût concedût;
- b) la liste des ativitâts no ametudis a contribût, cu la sintesi des motivazions di no amissibilitât.

4. Il contribût al è concedût cun decret dal Diretôr.

5. Il beneficiari si impegne a dâ une evidence juste de poie de ARLeF te suaze de iniziative realizade, cu la menzon dal contribût dât e cul inseriment dal logo de Agenzie e di chel de Region. Si impegne ancje a furnî copie dal eventuâl materiâl produsût.

Art. 9 variacions e proroghis

1. Il beneficiari al à di lâ daûr, te realizazion de ativitât, di ce che al à specificât te documentazion furnide tal moment de presentazion de domande. Il Diretôr al pues autorizâ, in maniere preventive e daûr di une domande motivade, eventuâls variacions dai elements progjetuâi o compensazions tra lis tipologjiiis diviersis di spese amissibile previodude, dome par une impossibilitât intervignude te realizazion des ativitâts in maniere conforme a ce che al jere programât in origjin, e dome se si garantìs l'otigniment des finalitâts previodudis dal Bant. La proroghe dal tiermin previodût pe conclusion des ativitâts e pues jessi concedude dal Diretôr, daûr di une domande motivade di presentâ prime de scjadince dal tiermin stes.

Art. 10 erogazion dal contribût

1. Il contribût al è dât fûr cu lis modalitâts specificadis tal bant. Tal câs di erogazion

anticipade, la erogazion dal salt e je subordenade ae verifiche de regolaritât dal rindicont e dal cumplîsi dai risultâts previodûts.

2. Tal câs di ritart grâf imputabil al sogjet realizadôr te realizazion de iniziative, o in presince di situazions che a podedin puartâ ae pierdite dal interès public peât ae iniziative stesse, il Diretôr, dopo vê otignût un parê obligatori e vincolant dal CTS, al pues sospindi la erogazion o ben revocâ il contribût.

Art. 11 rindicontazion

1. Il rindicont dal contribût al è presentât ae ARLeF dentri dal tiermin fissât dal bant, cu lis modalitâts previodudis dal Titul II, Cjapitul III, de leç regionâl dai 20 di Març dal 2000, n. 7 (Test unic des normis in materie di procediment aministratîf e di dirit di acès) e specificadis dal bant stes.

2. In sede di rindicontazion a son ametudis compensazions fra lis vôs di spese dome se motivadis e dut câs no in misure plui grande dal 25 par cent di chês.

3. Il tiermin di rindicontazion al pues jessi prorogât pûr che la domande relative e vedi une juste motivazion e che e sedi presentade prin dal tiermin stes.

Art 11-bis revoche e controï

1. Il Diretôr al pues ordenâ la revoche dal contribût se si verifiche:

- a) la diformitât sostanziâl tra la iniziative realizade e chês ogjet dal proviodiment di concession;
- b) ritarts grâfs te realizazion de iniziative, par colpe dal sogjet realizadôr;
- c) situazions dulà che si riten che l'interès public colegât ae iniziative nol vegni intivât;
- d) altris câs previodûts dal Bant.

2. I beneficiaris a puedin jessi metûts in stât di verifiche ispetive o controï, in particolâr cun riferiment ae realizazion efetive de iniziative finanziade e al riscuintri analitic de documentazion che e ateste l'ûs dai contribûts concedûts.

Art. 12 rimant

1. Par chel che nol è previodût di chest regolament si aplichin lis normis contignudis tal Titul II e tal Titul III de leç regionâl dai 20 di Març dal 2000, n. 7 (Test unic des normis in materie di procediment aministratîf e di dirit di acès).

Art. 13 jentrade in vore

1. Chest regolament al ven inserît te racuelte dai regolaments de ARLeF e al ven metût in vore la zornade stesse de sô publicazion sul sît internet de ARLeF.